

道
統
大
成

(上)

B22
W056

汪東亭輯

道
統
大

新文豐出版公司
印行



507928/12



10070424

參同契闡幽序

大道○本無言說。本無名相。混沌沌。莫知其端。然非假言說名相以表之。則道終不顯。昔者羲皇作易。直指乾坤。老子著經。全提道德。賴此兩聖。鑿破混沌面目。人人分上。底性命根源。纔知着落處。大道從此開明矣。二書同出一源。其後不幸而分。爲儒玄兩家。宗易者流。爲象數之小儒。宗玄者流。爲延年之方士。而歸根復命之學。或幾乎息矣。孰能會而通之。其惟參同契乎。此書出自漢代。伯陽魏祖。假卦爻法象。以顯性命根源。性乃萬劫不壞之

元神。命則虛無祖炁。元始至精也。拈一卽兩。舉兩卽三。會三卽一。故言神而精氣在。精氣非麓。言精氣而神在。神非精也。言性而命存。命非滯於有言。命而性存。性非淪於無也。只此兩字真詮。可分可合。可放可收。在義易則以乾坤爲衆卦之父母。在老子則以道德爲萬象之總持。後來諸子百家橫說豎說。總不出這兩字範圍。順而達之。則曰天命之謂性。逆而還之。則曰窮理盡性。以至於命。堂堂大道。三教合轍。千聖同歸。外此悉屬旁蹊曲徑矣。夫此逆還之法。本自無多。作者慈悲。豈不欲當頭直指。但恐知音者。

希未堪明破。不得不從無言說中。強生言說。從無名相中。強立名相。慄淡經營。秘母言子。遂以兩字真詮。疊成七卷。於是分御政養性伏食爲三門。又分藥物爐鼎火候爲三家。一門中各具三門。一家中各具三家。三而參之。九轉之功。於是乎畢。此其所以爲參同契也。惟參也。乃見性命之各正。惟同也。乃見性命之不二。惟契也。乃見窮理盡性至命之要歸。七卷中條分條合。條放條收。大約前主分。後主合。前主放。後主收。錯綜變化。自然成文。此參同契之所以未易知。未易言也。元育髫年慕道。最初拜北宗張碧虛。

師指示玄關。便於此書得個人門。而尙未窺其堂奧。從此足窮五嶽。徧參諸方。鮮有豁我積疑者。最後入終南深處。幸遇靈寶老人。點開心易。表裏洞然。方知一粟可藏世界。微塵堪轉法輪。是真實語。然此向上機關。詎堪饒舌。猶憶告別老人時。臨歧丁寧。囑以廣度後人。無令斷絕。且機緣多在大江以南。旣而束裝南旋。入園辦道。賴毘陵諸法侶。竭力護持。釐了一大事。丁酉歲。挈門下潘子靜觀習靜華陽。兼覽道藏。信手抽出參同契一函。快讀數遍。如貧子得寶藏。不勝慶快。平生竊念此書源流最遠。實爲丹經鼻

祖諸真命脉。魏祖曾將此書親授青州從事徐公。徐遂隱
名註之。今已失傳。後來註者紛紛錯會不少。甚至流入彼
家爐火諸旁門。而祖意益晦塞矣。育甚憫之。思發其覆。遂
禁足結冬。日誦正文一兩章。與潘子究其大義。令筆錄焉。
深山靜夜。秉燭圍爐。兩人細談堂奧。中事思之不得。鬼神
來告。久而豁然貫徹矣。更八十晨昏。草本乃就。題曰闡幽。
謂此書向來埋藏九地。而今始升九天之上也。此書向來
沉淪幽谷。而今始浴咸池之光也。既脫稿。復與潘子改正
數番。剝盡皮膚。獨留真實。私作枕中鴻寶。歲在丁未。許子

靜篤。啟請流通。公諸同志。張子靜鑑。實佐焉。於是鳩工募刻。同志翕然響應。而七卷次第告成。請余作序。因畧述其所得於師者。以就正有道焉。并願讀是書者。勿滯言說。勿膠名相。只從此中。○討消息。始而範圍造化。旣而粉碎虛空。有何御政。養性。伏食之可析。有何藥物。爐鼎火候之可分。并性命兩字。亦可不建立矣。如是會去。差足報魏祖徐祖。及從上諸祖之恩。差足報義皇老子。及從上諸聖之恩。而世出世間情。與無情。一切山河大地。蠢動含靈之恩。亦無不報矣。一道平等。頭頭各現。將見情與無情。悉發大。

光明藏。破暗燭幽。余亦從此兀然忘言矣。
康熙己酉仲春朔旦北宗龍門派下弟子朱元育稽首敬
撰。

道統大成

周易參同契

新安汪啟瀨東亭 輯

東漢魏伯陽真人著

京江韓景奭仲萬評點

雲陽道人朱元育闡幽

許啟邦 校刊

參同契者東漢魏真人伯陽所作。蓋以易道明丹道也。易道之要。不外一陰一陽。丹道之用。亦不外一陰一陽。一陰一陽。合而成易。大道在其中矣。參者參伍之參。同者合同之同。契者相契之契。書中分上中下三篇。篇中分御政養性伏食三家。必參互三家。使大易性情黃老

養性。爐火之事。合同爲一方。與盡性至命之大道相契。舉一端則三者全具其中。以末卷三相類宗旨校勘。卽了然矣。

上篇

上卷言御政。共計五章。乃上篇之上也。

此卷專言御政。而養性伏食已寓其中。蓋所謂御政者。陳乾坤坎離之法象。隱然具君臣上下之規模。君主無爲。臣主有爲。卽養性伏食兩道之所取則也。故末篇又稱大易情性。

乾坤門戶章第一

此章首揭乾坤門戶。包括萬化。乃全書之綱領也。乾坤者。易之門戶。衆卦之父母。坎離匡廓。運轂正軸。此節言一陰一陽之道。不出乾坤範圍也。蓋天地間只此一陰一陽。其本體則謂之道。其化機則謂之易。其神用則謂之丹。易道之陰陽。不外乾坤。丹道之陰陽。不出性命。乾坤卽性命也。然必窮取未生以前消息。方知天地于此造端。人身于此託始。丹道卽于此立基。原夫鴻濛之先。一炁未兆。不可道。亦不可名。廓然太虛。無方無體。是謂真空。空中不空。是謂妙有。惟卽有而空。故無始。

之始強名曰天地之始。惟卽空而有。故有始之始。強名曰萬物之母。卽有而空。便是太極。本無極。卽空而有。便是無極。而太極太極之體。本來無動無靜。動而無動。乾之所以爲天也。而輕清者有其根矣。靜而無靜。坤之所以爲地也。而堅凝者有其基矣。一動一靜之間。人之所。以爲天地心也。而易之生生不息者。在其中矣。胚胎雖具。混沌未分。故曰太極。函三迨其靜極。而動。乾之一陽直徹于九地之下。而坤承之。陰中包陽。實而成坎。是謂天一生水。在地中爲水。在天上爲月。及其動極。復靜。坤

之一陰直達于九天之上而乾統之陽中含陰破而成離是爲地二生火在世間爲火在天上爲日此由太極而生兩儀由兩儀而生四象也天地非日月不顯乾坤非坎離不運故在易道必以乾坤爲體坎離爲用何以言之乾之爲物靜專而動直六十四卦之陽皆出入于乾戶究竟只是最初一陽坤之爲物靜翕而動闢六十四卦之陰皆闔闢于坤門究竟只是最初一陰一陰一陽是謂真易乾知大始實爲衆陽之父故乾道成男曰震曰坎曰艮坤作成物實爲衆陰之母故坤道成女曰

巽曰離曰兌從此交易變易生生不窮重之爲六十四卦衍之爲四千九十六卦豈非乾坤者易之門戶衆卦之父母乎六子皆出于乾坤而獨用坎離者何也蓋震巽艮兌各得乾坤之偏體坎離獨得乾坤之正體先天定位本乾南坤北惟以中爻相易而成坎離後天翻卦遂轉作離南坎北其實乾坤包羅在外天地之匡廓依然不動而坎離之一日一月自然運旋其中小之爲晝夜晦朔大之爲春秋寒暑又大之爲元會運世譬若御車然中心虛者爲轂兩頭轉動者爲軸車本不能自運

惟賴兩頭之軸。兩頭之軸。又賴中心之轂。以運之。車待軸而轉動。軸又待轂而運旋。其用方全。坎離之于乾坤。亦然。豈非坎離匡廓。運轂正軸乎。老子云。三十幅共一轂。當其無有車之用。此之謂也。此章爲全書綱領。此節又是通章綱領。乾坤門戶。在丹道爲爐鼎。坎離匡廓。在丹道爲藥物。火候出其中矣。

牝牡四卦。以爲橐籥。覆冒陰陽之道。猶工御者。準繩墨。執銜轡。正規矩。隨軌轍。處中以制外。數在律歷紀。

此節言乾坤化出坎離。能覆冒陰陽之道也。乾本老陽。

牡也。追中爻變出離之少陰。則牡轉爲牝矣。坤本老陰。
 牝也。追中爻變出坎之少陽。則牝轉爲牡矣。坤轉爲坎。
 九地之下淵乎。莫測氣機動而愈出。是爲無底之橐籥。
 轉爲離。九天之上。一線潛通。本體虛而不屈。是爲有孔。
 之籥。老子云。天地之間。其猶橐籥乎。指此而言。故曰。牝。
 牡。四卦以爲橐籥。坎離二氣一往一來。出入于天地之。
 間。而晝夜晦朔。春秋寒暑。纖毫不爽。名曰四卦。其實只。
 是一坎一離。名曰兩卦。其實只是坎離中間一陰一陽。
 乃六十卦之全體。三百六十爻之全用。無不覆冒其中。